

Tehnički i pravni aspekti Carinske tarife

Poznavanje robe predstavlja nužnu pretpostavku za njenu preciznu identifikaciju i utvrđivanje odgovarajućeg tarifnog stava u skladu s pravilima o svrstavanju * Precizno tumačenje pojmova koji se pojavljuju u Carinskoj tarifi predstavlja važan uslov za utvrđivanje odgovarajućeg tarifnog stava

Pripremio: **mr. Sanel JAKUPOVIĆ**

Posmatrano u užem smislu, svrstavanje nekog proizvoda u Carinsku tarifu podrazumijeva određivanje odgovarajućeg tarifnog podbroja koji nije dalje dijeljen i za koji je propisana stopa carine, a označen je tarifnom oznakom od 10 cifara. Pojednostavljeno rečeno, to se svodi na postupak utvrđivanja desetocifrene tarifne oznake za neku robu. Ovaj postupak, u suštini, predstavlja proceduru svrstavanja. Međutim, praktični razlozi koji su vezani za potrebe carinjenja robe nameću i definisanje pojma svrstavanje robe u Carinsku tarifu na kompleksniji način. U širem smislu, svrstavanjem robe u Carinsku tarifu smatra se određivanje tarifnog stava za bilo koji proizvod koji se pojavljuje kao predmet svrstavanja. Tarifni stav predstavlja najmanju jedinicu specifikacije robe u Carinskoj tarifi kojoj odgovara određena stopa carine, a obuhvata (i) tarifnu oznaku (numeričku oznaku od 10 cifara), (ii) naimenovanje tarifnog podbroja koji nije dalje raščlanjivan i (iii) stopu carine propisanu za robu iz tog tarifnog podbroja.

Primjer tarifnog stava:

0711 90 30 00	--- slatki kukuruz	-	5
---------------	--------------------	---	---

U Jedinствenoj carinskoj ispravi (JCI) tarifni stav je, zbog same strukture dokumenta kreiranog za potrebe njegove obrade u odgovarajućem informacionom sistemu, podijeljen u tri rubrike - 33. (tarifna oznaka), 31. (naimenovanje robe) i rubriku 47. (stopa carine). Za potrebe nomenklature Carinske tarife, tarifne oznake, dakle, predstavljaju numeričke oznake kojima su označeni tarifni brojevi i tarifni podbrojevi. Prilikom popunjavanja JCI za carinjenje robe u prve dvije podjele rubrike 33 upisuje se šifra koja ima 12 cifara. U njoj prvih 10 cifara predstavlja tarifnu oznaku iz Carinske tarife, a 11. i 12. cifra služe za potrebu označavanja proizvoda na koje se primjenjuju posebni propisi (ukoliko nema primjene posebnih propisa na robu koja je navedena u naimenovanjima JCI, 11. i 12. cifra su nule). Dakle, 11. i 12. cifra u rubrici 33. JCI nisu dio tarifne oznake koja je propisana u Carinskoj tarifi.

Naimenovanje robe, kao dio carinskog tarifnog stava, treba da definiše svrstavanje robe u Carinsku tarifu,

svrstavanje robe po drugim tarifama i propisima, identifikaciju robe primjenu svih propisa koji se primjenjuju pri uvozu ili izvozu, a u vezi su sa konkretnom robom. Istovremeno, naimenovanje robe treba da bude kratko, jasno, potpuno i nedvosmisleno. Oblik naimenovanja robe prema Carinskoj tarifi, koji proizilazi iz navedene definicije tarifnog stava, može se izvesti na dva načina: (a) naimenovanje se sastoji isključivo od teksta samoga tarifnog podbroja označenog sa deset cifara i (b) naimenovanje, po potrebi, uključuje i dijelove naimenovanja tarifnog broja, kao i podbrojeva i međupodbrojeva na nižem nivou raščlanjivanja. Prethodno prikazani način upotrebe naimenovanja naziva se još i čisto nomenklaturno naimenovanje. Ono može biti prošireno, što se preporučuje, sa uobičajenim trgovačkim nazivom robe. Čisto naimenovanje, u određenim slučajevima, odgovara samom tekstu iz naimenovanja podbroja označenog sa deset cifara, uobičajeno, kada su ispunjeni uslovi da ovakvo naimenovanje odgovara trgovačkom nazivu robe, te da nomenklatura Carinske tarife ne ostavlja bilo kakvu mogućnost svrstavanja robe u neko drugo mjesto u Carinskoj tarifi. Na primjer, naimenovanje robe iz Carinske tarife *Smokve, svježe* u okviru tarifne oznake *0804 20 10 00* odnosi se na konkretan naznačeni proizvod, iako se naimenovanje tarifnog broja *0804* odnosi i na *datule, ananas, avokado, guava, mango i mangusta, svježe ili suhe, ali i suhe smokve*, te nema

potrebe da se naimenovanje konkretne robe, koja se može jednoznačno i nedvosmisleno prepoznati unutar naimenovanja tarifnog broja i podbrojeva unutar istog, opterećuje sa dijelovima teksta koji se ne odnose na robu koja je predmet svrstavanja prema Carinskoj tarifi. Međutim, Carinska tarifa je obuhvaćena sa mnogobrojnim primjerima kada je potrebno upotrijebiti kombinaciju dijelova naimenovanja tarifnog broja i odgovarajućih podbrojeva i međupodbrojeva. To se, u pravilu, odnosi na robu koja se ne može u potpunosti definisati sa naimenovanjem podbroja označenog sa deset cifara (u koji se određena roba svrstava), tj. kada to naimenovanje ne određuje jednoznačno svrstavanje robe u odabrani tarifni stav. Na sljedećem primjeru prikazano je kako se vrši kombinacija upotrebe naimenovanja različitih nivou raščlanjivanja za robu opisanu kao *upotrebljavani putnički automobil, s dizel-motorom, zapremine 1987 cm³*. Ovakav automobil se svrstava u tarifni stav *8703 32 90 00* Carinske tarife.